

禹貢匯疏

禹貢滙疏卷十二

吳興茅瑞徵纂并箋

男

胤京
烈武

九州攸同四隩既宅九山刊旅九川滌源九澤既陂
四海會同

疏音亮遭洪水道路阻絕今水土既治天下大同
故總叙之今九州所共同矣所同者四方之宅已
盡可居矣九州之山刊槎其木旅祭之矣九州之
川滌除泉源無壅塞矣九州之澤已皆陂障無決
溢矣四海之內皆得會同京師無乖異矣 說文

云堯遭洪水民居水中爲高土故曰九州孔氏曰

中國爲九州者以水中可居曰洲居民之外皆有

水也

天地之勢
四邊有水

河圖括地象曰八極之廣東西

二億三萬四千里南北二億三萬一千五百里夏

禹所治四海內地東西二萬八千里南北二萬六

千里天有九道地有九州 孔安國書序云九州

之志謂之九丘丘聚也言九州所有土地所生風

氣所宜皆聚此書楚左史倚相能讀九丘孔子述

職方以除九丘 說苑曰八荒之內有四海四海

之內有九州天子處中州而制八方耳 章俊

曰禹別四海爲九州宜若有均一之制而較其道

里廣狹全不相侔濟河兗州淮岱徐州相去不能千里

荆河豫州千里而瀛海岱占州千里而縮荆山衡陽荆州

二千里而遙東海西河冀州二千里而近壽春之淮

潮陽之海揚州相去且六千里龍門之黃河燉煌之

黑水梁州相去踰四千里至華陽黑水梁州窮數千里

而未知所徑是何廣狹之殊也或者九州之別品

殊墳壤因土宜而別也故其道里無得而均然而

荆河淮濟之間

徐兗豫三州境

截長補短不能當淮海一

州之半借使三州土壤旣殊不可得而并揚州之

大獨不可得而釐耶竊嘗討之九州之別蓋倣井

田之法

井田始於黃帝

方里而井九百畝中爲公田八家

皆私百畝同養公田而九州之制一州爲王圻八

州建國以蕃王室是同養公田之義也故其區別

境壤不因土宇之小大不限山川之間隔惟據民

田多寡而均之耳嘗考西漢時去古未遠方其極

盛九有民戶總記千二百餘萬而徐兗豫三州當

五百五十萬戶青冀二州當三百五十萬戶而荆
揚雍梁四州僅當三百萬戶推其戶口之多寡足
以見田疇之廣濶九州之別唯民田是均斷可考
矣 鄒衍著書云中國於天下八十一分居其一
分耳中國名赤縣赤縣內自有九州禹之叙九州
是也不得爲州數中國外如赤縣州者有九乃謂
九州也有裨海環之如一區中者乃爲一州如是
者九乃有大瀛海環其外天地之際焉 淮南子
曰九州之大純方千里九州之外乃有八殞八殞

之外而有八紘八紘之外乃有八極凡八極之雲
是雨天下八門之風是節寒暑八紘八殞八澤之
雲以雨九州而和中土

疏室隅爲隩隩是內也人之造宅爲居至其隩內
遂以隩表宅上文諸州言山川澤皆舉大言之所
言不盡故於此更總之九山九川九澤言九州之
內所有山川澤無大無小皆刊槎決除已訖其皆
旅祭 上官氏曰天下山水見於禹貢者四十有
五而九水爲大九山爲高大者旣導則小者無不

順矣高者既治則卑者無不平矣此九山九川所以叙於九州之後也 史記索隱曰岍壺口底柱太行西傾熊耳嶓冢內方岐是九山也弱黑河濟江沅淮渭雒爲九川 淮南子曰九山會稽泰山王屋首山太華岐山太行羊腸孟門九藪越之具區楚之雲夢秦之陽紆一名晉之大陸鄭之圃田宋之孟諸齊之海隅趙之鉅鹿燕之昭余今太原郡疏川言滌除泉源從其所出至其所入皆蕩除之無壅塞也澤言既陂徃前濫溢今時水定或作陂

以障之使無決溢詩云彼澤之陂毛傳云陂澤障也周語太子晉曰夫山土之聚也藪物之歸也川氣之導也澤水之鍾也夫天地成而聚於高歸物於下疏爲川谷以導其氣陂唐汚庠以鍾其美

韋昭云畜水爲陂

風俗通云謹按傳曰陂者繁也言因

下鍾水以繁利萬物也歐陽詹曰水不注川者

在藪澤則曰陂杜預曰頃戶口日增而陂竭歲

決良田變生蒲葦人居沮澤之際水陸失宜放牧絕種樹木立枯皆陂之害也陂多則土薄水淺潦

不下潤故每有水雨輒復橫流延及陸田其舊陂
舊塢皆當脩繕以積水諸所造立皆決瀝之又曰
水去之後溟淤之田畝收數鍾至春大種五穀五
穀必豐

晉書

傳四海之內會同于京師九州同風萬國共貫

疏禮諸侯之見天子時見曰會殷見曰同 林氏

曰周禮藏方氏辨九州之國同其貫利益必先辨
之於其始然後可以同之於其終禹貢所載自冀
州旣載壺口以下列叙九州之疆界治水之曲折

與夫田賦之貢篚所入之多寡所輸之遠近其所
以辨之者纖悉盡矣自九州攸同以下又所以同
之也蓋有以辨之則廣谷大川異制民生其間異
俗五味異和器械異制衣服異宜各得其所而不
雜亂有以同之則車同軌書同文行同倫各要其
歸而不見其爲異此先王疆理天下之大要也

箋九州攸同四海會同恰相應看本節文勢仍須
將四隩既宅句另說而九山九川九澤總結以四
海會同以應九州攸同之意史叙其分則曰禹敷

土叙其合則曰攸同會同 史記於導山上加九
山字導水上加九川字蓋謂卽此九山九川也然
經文各山不止於九似依疏解爲當 四隩蘇氏
云隩深也四方深遠者皆可居爾雅厓內爲隩李
巡云涯內近水爲隩 刊旅獨兼二義并結首節
隨川 潘季馴曰考禹貢云九澤旣陂傳曰九州
之澤已有陂障而無決潰則禹之導水何嘗不以
隄哉 王氏樵曰四海會同者言九州之外薄於
四海百川以四海爲歸是無不會同也九州言水

之治其文不同而此則總之曰九州滌源滌源二字理最深微聖人萬事無不從其本而治之也要之鑿龍門疏九河有治其上流有治其下流是其功非一處而惟總之曰滌源則皆舉之矣 章潢曰禹之治水不但疏決江河凡天下平土皆制其井畝疏爲溝澮以達于川所謂畝澮者卽田間之畎一同之澮也所謂溝澮者卽一井之溝一成之澮也則是井田之制自禹定之

六府孔脩庶土交正底慎財賦咸則三壤成賦中邦

傳水火金木土穀甚脩治

疏府者藏財之處六

者貨財所聚故稱六府

董氏曰九疇先五行五

行一曰水水治則六府皆治

展禽曰五行所以

生殖也及九州名山川澤所以出財用也

淮南

子曰以水和土以土和火以火化金以金治木木

復反土五行相治所以成器用

陸贄曰大凡生

於天地之間五材之用爲急五材者金木水火土

也水火不資於作金木自產於山澤唯土爰播

植非力不成衣食之源皆出於此

疏洪水之時高下皆水土失本性今水災旣除衆土俱得其正謂壤墳壚還復其性也諸州之土青黎是色塗泥是濕土性之異惟有壤墳壚耳

蘇

傳交通也正平準也庶土不通有無則輕重偏矣故交通而平準之帝王世紀曰禹平水土其時九州之地凡二千四百三十萬八千二十四頃定墾者九百二十萬八千二十四頃

疏致所慎者財貨貢賦謹慎其事不使害人言取民有節什一而稅不過度也皇甫湜曰任土之

貢生產有常履畝之收等籍既定人識所出吏難爲姦

疏土壤各有肥瘠貢賦從地而出故分其土壤爲上中下計其肥瘠等級甚多但舉其大較定爲三品法則地之善惡以爲貢賦之差雖細分三品以爲九等人功脩少當時小異要民之常稅必準其土故皆法三壤成九州

賦

纂要云上中下謂之三壤

陳祥

道曰冀州白而壤雍州黃而壤豫州厥土惟壤則壤色非一而已壤與墳埴塗泥雖殊而墳埴塗泥

亦壤中之小別耳此禹貢總言三壤而周官總言十二壤也 史記平準書曰禹貢九州各因其土地所宜人民所多少而納職焉 蘇傳九州各則

壤之高下以制國用爲賦入之多少中邦諸夏也貢篚有及於四夷者而賦止於諸夏也 鹽鐵論

曰禹平水上定九州四方各以土地所生貢獻足以充宮室供人主之欲膏壤萬里山川之利足以富百姓不待蠻貊之地遠方之物而用足 程秘曰賦出於田而又參以土焉曰成則三壤成賦中

邦此賦之出於田也曰庶土交正庶謹財賦此賦
之出於土也賦出於田參之以土而又以其灌溉
之利否與人力之勤惰而加審焉 陳氏大猷曰
正庶土而慎財賦所以總結九州所貢篚之物則
三壤以成中邦之賦所以總結九州九等之田與
賦

箋此節照蔡註單提六府孔脩下分庶土穀土謂
庶土二句說貢咸則二句說賦重慎字成字慎卽
惟服食器用成卽以萬民惟正之供然詳本文有

兩賦字庶慎句何以云專指貢也且三壤正應庶
土經文原無穀土字面似應照本文開說通節重
底慎財賦句蓋水土既平財賦隨定易生心于廣
大以三壤爲則無偏輕重矣賦止中邦無勤遠畧
矣且賦曰成則一成不變并無加賦之累矣成則
二句取於民有制是乃所以爲底慎也 有土斯
有財而歛財以賦經制稍一濫觴將流毒民生國
計何所底止總繇一念不慎胎禍耳底慎二字乃
千古理財之長慮其要只在物土之宜而交正之

高下不爽其衡而已成則三壤正所謂交正也因
壤定賦一戎而不變是謂成賦賦無成額而加派
橫索之端紛紜而起用民日新而取之如竭髓豈
禹當日底慎之意哉 六府孔脩卽禹所稱水火
金木土穀惟脩也庶土交正結前敎土及各州厥
土句成賦中邦結各州厥賦句 王綱振曰六府
孔脩不單是治水其實六府皆有所事如言敷土
而土可宅可藝可作又未嘗不脩土也如言刊木
而木漸包而惟條惟喬未嘗不脩木也及土可作

藝而或賦總或賦銍桔或賦粟米非脩穀何以有
此若金不脩則荆揚必無三品之貢若火不脩則
雍青安得鹽鐵之供凡此皆孔脩者也 秦繼宗
曰庶字從九州生來土字從上文厥土等字生來
這土字兼高下之土言田亦在內交正者以其白
壤之類彼此相質而知其美惡是我辨正之也底
慎財賦恐其多取而病民此句虛下二句實之獨
言賦者天子畿內原有賦而無貢外八州諸侯則
賦于民而無貢之可言其貢于天子者亦是從賦

得來故舉賦可以該貢也

錫土姓

傳天子建德因生以賜姓謂有德之人生此地以
此地名賜之姓以顯之 疏周語稱帝嘉禹德賜
姓曰姒胙四岳賜姓曰姜左傳稱周賜陳胡公之
姓爲媯皆是因生賜姓之事 林氏曰水土平可
以封建諸侯也如契封於商賜姓子稷封於邵賜
姓姬有土有社昔固有矣至是徧錫之 庾信曰
昔軒丘命氏初分兄弟之姓若水降居始建諸侯

之國自是以官爲族因地爲宗。羅泌曰土以立其國姓以立其宗土姓錫而宗國定矣國立而後氓人有所依宗立而後族姓有所繫人有所依斯有以君之族有所繫斯有以宗之方水土平諸侯固各有國土百官亦各有族姓矣必九州攸同而復錫之者前乎此惟有所不普至是而後得以錫之徧爾又曰封建自三皇建之於前五帝承之于後而其制始備古者司商以協民姓民庶之家無妄改也昔魯之公索氏將祭而忘其始人以是龜

其必亡可不戒哉

鄭樵曰黃帝方制萬里爲萬國各百里唐虞夏建國凡五等曰公侯伯子男商公侯伯三等周公侯伯子男五等 馬端臨曰封建莫知其所從始也禹塗山之會號稱萬國湯受命時凡三千國周定五等之封凡千七百七十三國至春秋時見於經傳者僅一百六十五國而蠻夷戎狄亦在其中

白虎通曰王者卽位先封賢者憂人之急也故列土爲疆非爲諸侯張官故府非爲卿大夫皆爲民

也易曰利建侯此因所利故立之 葉適曰井田
廢於商鞅而後諸侯亡封建絕井田雖在亦不能
獨存矣故井田封建相待而行者也 李涪刊誤
曰近者凡所封邑必取得姓之國竊以蕭何封鄼
侯蕭之得姓不在於鄼曹參封平陽侯曹之得姓
不在平陽其誤始於幸蜀之年 中書主者不開舊
制故也

唐武后嘗問諸儒言氏族皆本炎黃之裔則上古
乃無百姓乎張說曰古未有姓若夷狄然自炎帝

之姜黃帝之姬始因所生地而爲之姓其後天子
建德因生以賜姓黃帝二十五子而得姓者十四
德同者姓同德異者姓殊其後或以官或以國或
以王父之字始爲賜族久乃爲姓降唐虞抵戰國
姓族漸廣周衰列國旣滅其民各以舊國爲之氏
下及兩漢人皆有姓故姓之以國者韓陳許鄭魯
衛趙魏爲多 晉司空季子曰同姓爲兄弟黃帝
之子二十五人其同姓者二人而已其同生而異
姓者四母之子別爲十二姓凡黃帝之子二十五

宗其得姓者十四人為十二姓

得姓以德居官而賜之姓也謂十四

人而二人為姬二人為已故十二姓

觀射父曰民之徹官百

以名達于

上王公之子弟之質能言能聽徹其官者而物賜

之姓以監其官是為百姓

以功事賜姓若司馬大史之屬

黃帝定氏族氏定而繫之姓庶姓別于上而戚殫

于下

路史

左傳無駭卒羽父請謚與族公問族于

眾仲對曰天子建德因生以賜姓胙之土而命之

氏諸侯以字為謚因以為族官有世功則有官族

邑亦如之公命以字為展氏孔穎達曰姓者生

也以此爲祖令之相生雖下及百世而此姓不改
族者屬也與其子孫共相連屬其旁支別屬則各
自立氏禮記大傳曰繫之以姓而弗別百世而昏
姻不通者周道然也是言子孫當共姓也其上文
云庶姓別於上而戚單於下是言子孫當別氏也
傳稱家皆爲氏氏族一也別而稱之謂之氏合而
言之則曰族記謂之庶姓者以始祖爲正姓高祖
爲庶姓亦氏族之別名也姓則受之於天子族則
稟之於時君賜族者有大功德宜世享祀者方始

賜之其士會之孥處秦者爲劉氏伍員之子在齊爲王孫氏外傳稱知果自別其族爲輔氏此類皆身自爲之非復君賜釋例曰子孫繁衍枝布葉分始承其本末取其別故其流至於百姓萬姓未必皆君賜也 趙彥衛曰姓氏後世不復別但曰姓某氏按史記帝紀注引春秋注云天子賜姓命氏諸侯命族族者氏之別名也姓者所以統繫百世使不別也氏者所以別子孫之所自出解春秋者云因生以賜姓者謂若舜之嬀禹之姁伯夷之姜

是已胖之土而命之氏者若舜之有虞禹之有夏
伯夷之有呂是已於字則叔牙季友展無駭臧僖
伯是已於謚則文武成宣宋戴惡衛齊惡是已於
官則司馬司徒之類是已於邑則韓魏趙是已詳
此諸侯既命於天子爲某公侯則是命之氏諸侯
位卑不得賜姓其有以王公及以字爲氏或以官
以邑既無土可分則姓與氏無別注史記者所以
有族者姓之別名之語姓者統百世如周姓姬氏
所以別子孫如魯衛毛聃邢晉應韓之分又春秋

之時諸侯之子爲大夫則稱公子孫則稱公孫公
孫之子與異姓之臣未賜族而身爲大夫則稱名
無駭佚之類是也已賜族而使之世爲大夫則稱
族如仲孫叔孫季孫之類是也此諸侯不得命氏
而得命族之例也

雲麓漫抄

鄭康成曰世本之篇言

姓則在上言氏則在下

林駟曰古者姓氏之權

出於上故易明後世姓氏之權出於下故難考

呂祖謙曰三代之時曰姓者統其祖考之所自出
也百世而不變曰氏者則其子孫之所自分也數

世而一變 王符志氏姓曰昔堯賜契姓姬賜禹
姓姒氏曰有夏伯夷爲姜氏曰有呂下及三代官
有世功則有官族邑亦如之後世因是以爲姓或
氏號邑謚或氏於爵或氏於志若夫五帝三王之
世所謂號也文武昭景成宣戴桓所謂謚也齊魯
吳楚秦晉燕趙所謂國也王氏侯氏王孫公孫所
謂爵也司馬司徒中行下軍所謂官也伯有孟孫
子服叔子所謂字也巫氏匠氏陶氏所謂事也東
門西門南宮東郭北郭所謂居也三烏五鹿青牛

白馬所謂志也

鄭樵曰三代以前姓氏分而爲二男子稱氏婦人稱姓氏所以別貴賤貴者有氏賤者有名無氏古之諸侯詛辭多曰墜命亡氏踣其國家以明亡氏與奪爵失國同可知其爲賤也故姓可呼爲氏氏不可呼爲姓姓所以別婚姻故有同姓異姓庶姓之別氏同姓不同者婚姻可通姓同氏不同者婚姻不可通三代之後姓氏合而爲一皆所以別婚姻而以地望明貴賤於文女生爲姓故姓之字多

從女如姬姜嬴嬀媯姑之類是也所以爲婦人之
稱如伯姬季姬孟姜叔姜之類並稱姓也 柳芳
論曰氏族者古史官所紀也昔周小史定繫世辨
昭穆故古有世本錄黃帝以來至春秋時諸侯卿
大夫名號繼統司馬遷父子迺約世本脩史記因
周譜明世家迺知姓氏之所由出先王之封旣絕
後嗣蒙福猶爲強家漢高帝興徒步有天下命官
以賢詔爵以功始尚官矣然猶徙山東豪傑以實
京師齊諸田楚屈景皆右姓也其後進拔豪英論

而錄之蓋七相五公所由興魏氏立九品置中正
尊世胄卑寒士晉宋因之始尚姓已于時有司選
舉必藉譜籍賈氏王氏譜學出焉過江則爲僑姓
東南則爲吳姓山東則爲郡姓關中亦號郡姓代
北則爲虜姓郡姓者以中國士人差第閥閱爲之
制凡三世有三公者曰膏粱有令僕者曰華腴尚
書領護而上者爲甲姓九卿若方伯者爲乙姓散
騎常侍太中大夫者爲丙姓吏部正員郎爲丁姓
凡得入者謂之四姓北齊因仍舉秀才州主簿郡

功曹非四姓不在選故江左定氏族凡郡上姓第一則爲右姓太和以郡四姓爲右姓周建德氏族以四海通望爲右姓隋開皇氏族以上品茂姓則爲右姓唐正觀氏族志凡第一等則爲右姓路氏著姓畧以盛門爲右姓柳冲氏族系錄凡四海望族則爲右姓不通歷代之說不可與言譜也夫文之弊至于尚官尚官之弊至于尚姓尚姓之弊至于尚詐隋承其弊迺反古道罷鄉舉離地著於是乎士無鄉里里無衣冠人無廉耻士族亂而庶人

僭矣 陳隨隱曰傳曰因生賜姓胙土命氏及字
謚官邑六者而已今推廣爲十七類一曰以國爲
氏五帝之前有國者不稱國以名爲氏所謂無懷
氏葛天氏伏羲氏燧人氏者也神農軒轅雖曰炎
帝黃帝猶以名爲氏至唐虞夏商周而后以國爲
氏諸侯亦然魯衛齊宋之類是也支庶稱氏適他
國則稱國如宋公子朝在韓則稱宋朝衛公孫鞅
在秦則稱衛鞅二曰以邑爲氏原以周邑而得氏
申以楚邑而得氏魯有沂邑因沂大夫相魯而以

沂相爲氏周有甘邑因其平公爲王卿士而以甘
士爲氏三曰以鄉爲氏四曰以亭爲氏封建五等
降國爲邑邑有關內侯鄉侯亭侯關內邑者溫原
蘇毛甘樊祭尹之類是也封於鄉者以鄉氏封於
亭者以亭氏五曰以地爲氏居傳巖者爲傅氏徙
稽山者爲稽氏主東蒙之祀者爲東蒙氏守橋山
之塚者則爲橋氏彫氏因彫塹食於彫門潁氏因
考叔爲潁谷封人東門襄仲爲東門氏桐門右司
爲桐門氏隱於甫里綺里者爲甫里氏綺里氏六

曰以姓爲氏姓之爲氏與地之爲氏皆因所居而
命也得賜者爲姓不得賜者爲地居姚墟者賜以
姚居嬴濱者賜以嬴姬之得賜居於姬水姜之得
賜居於姜水七曰以字爲氏八曰以名爲氏諸侯
之子稱公子公子之子稱公孫公孫之子以王父
字爲氏如鄭穆公之子曰公子駢字子駟其子曰
公孫夏其孫則曰駟帶駟乞宋威公之子曰公子
目夷字子魚其子曰公孫友其孫曰魚莒魚石魯
孝公之子曰公子展其子曰公孫夷伯其孫曰展

無駭展禽鄭穆公之子曰公子豐其子曰公孫段
其孫曰豐卷豐施天子之子亦然王子狐之後爲
狐氏王子朝之後爲朝氏如公子遂之子曰公孫
歸父字子家其後爲子家氏父字爲氏者也季孫
鉏字子彌其後爲公鉏氏父名爲氏者也九曰以
次爲氏伯仲叔季之類是也十曰以族爲氏族近
於次者氏之別也孟氏仲氏別兄弟也丁氏癸氏
別先後也祖氏禰氏別上下也第五氏第八氏以
同居別也孔氏子孔氏旗氏子旗氏字之別也軒

氏軒轅氏熊氏熊相氏名之別也季氏之有季孫氏仲氏之有仲孫氏叔氏之有叔孫氏嫡庶之別也十一日以官爲氏太史太師司馬司空是也十二日以爵爲氏皇王公侯是也十三日以謚爲氏莊氏出於楚莊王康氏出於衛康公魯僖公宣公之後爲僖氏宣氏文武哀繆皆是也十四日以吉德爲氏趙衰人愛之如冬日後爲冬日趙氏吉有賢人爲老成子後爲老成氏十五日以尚德爲氏英布被黔爲黔氏楊感梟首爲梟氏十六日以事

爲氏夏后氏遭有窮之難后緄方娠逃出自竇生
少康支孫以竇爲氏漢武帝認丞相田千秋乘小
車出入省中後因以車爲氏十七日以技爲氏巫
者之後爲巫氏以至卜氏匠氏叅龍御龍干將氏
亦莫不然三代之後姓氏混矣

白虎通曰人有姓何所以崇恩愛厚親親遠禽獸
別婚姻也姓生也人所稟天氣所以生者也尚書
曰平章百姓姓所以有百何古者聖人吹律定姓
以記其族人含五常而生身有五音宮商角徵羽

轉而相雜五十二十五轉生四時故百而異也

仲山父曰古者司商協名姓韋昭註司商掌賜族受姓之官商金聲清謂人始生吹律合之定其姓名呂才曰近世有五姓直野人巫師說爾按堪輿經黃帝對天老始言五姓且黃帝時獨姬姜數姓耳後世賜族者寢多然管蔡郕霍魯衛毛聃郤雍曹滕畢原酆郇本之姬姓孔殷宋華向蕭亳皇甫本之子姓至因官命氏因邑賜族本同本異叵爲配官商哉春秋以陳衛秦爲水姓齊鄭宋爲火

姓或所出之祖所分之星所居之地以著由來非
宮商角徵羽相管攝也

幾王者建萬國以親諸侯有土非一人之私也能
敷之而分疆裂地見聖人經天下之遠畧能錫之
而建侯樹屏見聖人公天下之大端古之帝王必
封建以各有其土所從來遠矣水土旣平之後邦
家再造特指言之 楊慎曰封建起於黃帝至秦
而廢 胡氏瓚曰封建之來因洪水之患則限制
多不明有水土之功則庸勞所當賞故曰封建與

井田相表裏也姓始于黃帝正姓爲姓庶姓爲氏

王氏樵曰當時堯舜在上封建雖非禹所得專

而實一出禹所經畫所謂弼成五服也朱子謂因

生以賜姓如舜居媯汭及武王卽位封舜之後于

陳賜姓爲媯諸侯以字爲謚謚當作氏孫以王父

之宗爲氏如魯有子展其後爲展氏展喜展禽是

也此姓與氏之分也後世以氏爲姓而姓氏遂無

辨

唐時姓異而所出同者禁不得爲婚姻

王氏鏊曰姓與氏不分

久矣今人多以氏爲姓姓以繫百世之正統氏以

別子孫之旁出族則氏之所聚而已蓋別姓則有
爲氏別氏則爲族族無不同之氏氏有不同之族
故八元八凱出於高陽氏高辛氏而謂之十六族
是氏有不同族也宋氏華氏謂之戴族向氏謂之
桓族是族無不同氏也詩曰振振公族太史公曰
自黃帝至舜禹皆同姓而異其國號又曰秦之先
爲嬴姓其後分封以國爲姓有十四氏又如周本
姬姓其子孫如魯衛毛邾邰雍曹滕畢原鄆郇邠
晉應韓凡蔣邢茅各以國氏而皆姬姓也後之文

人惟昌黎知之故曰韓姬姓又曰何與韓同姓爲
近鄭氏曉曰姓與氏異姓其本也氏其支也故
曰言姓必在上言氏必在下如稱周王則曰姓姬
不得曰姬氏稱四岳則曰許氏不得曰姓許今人
皆書姓某氏相襲誤耳又曰姓字從女生故上古
八大姓皆從女曰姜曰姬曰嬀曰姁曰嬴曰姑曰
姚曰姁陸深曰自秦毀典籍聖賢之世系湮沒
而姓氏遂不辨後世婦人一例稱氏何所本歟傳
曰別生分類蓋姓之爲言生也氏之爲言類也此

姓氏之說漢去古未遠凌煙圖畫題曰大將軍博
陸侯霍氏以氏代名蓋男子之美稱爾豈有姓有
氏男女通稱歟左傳天子建德因生以賜姓胙之
土而命之氏義各有取難以混稱也若堯舜姬姓
稱陶唐氏有虞氏大禹姒姓稱有夏氏成湯子姓
稱有商氏呂東萊云氏數世而一變恐亦難以自
分而隨變也按姜姓爲呂氏至于今不變若國氏
爲子國之後駟氏爲子駟之後所謂以字爲氏者
也又有以郡以謚以官以爵以居又以所有事爲

氏皆不容變

祇台德先不距朕行

疏天子立意常自以敬我德爲先則天下之民無有距違我天子所行者皆禹之使然故叙而美之

王氏炎曰台朕皆禹自言

左傳劉子曰美哉

禹功明德遠矣微禹吾其魚乎 展禽曰禹能以

德脩鯀之功

箋此禹因水土平治之後而採本言之要見此時天下大勢已定不比懷襄昏墊之時人情惶惑亦

唯謹視上所率先而已若上之人敬我德以爲天下先則而象之自然奉行恐後有風行草偃之勢諒無復梗我王化者此敬德不可後也台朕不必專有所指只據理泚說以見此時德之流行有操縱如意之妙 禹荒度土功密矣而廣土衆民貴有以柔其心以就我約束本原之地全在台德而秉德以爲天下先其要曰祇我先而人自不敢後大學曰先慎乎德有德此有人有土而有財有用正與此互相發 王氏樵曰一篇皆記禹經理之

事此二句禹經理之要也無此以爲之本雖胼手
胝足勞其身以爲天下能使人之不應後志而轉
移氣化也哉

五百里甸服百里賦納總二百里納銍三百里納秸
服四百里粟五百里米

傳規方千里之內謂之甸服爲天子服治田去王
城而五百里疏旣言九州同風法壤成賦而四
海之內路有遠近更叙弼成五服之事甸侯綬要
荒五服之名堯之舊制洪水旣平之後禹乃爲之

節文使賦役有恒職掌分定甸服去京師最近賦
稅尤多故每於百里卽爲一節候服稍遠近者供
役故二百里內各爲一節三百里外共爲一節綏
要荒三服去京師益遠每服分而爲二內三百里
爲一節外二百里爲一節以遠近有較故其任不
等甸服入穀故發首言賦稅也賦令自送入官故
三百里內每皆言納四百里五百里不言納者從
上省文也於三百里言服者舉中以明上下皆是
服王事也侯服以外貢不入穀 陳氏大猷曰禹

之甸法達於天下詩奕奕梁山維禹甸之傳少康
有田一成皆甸法也王畿獨以甸名服者農事國
之本也京師聲名文物之所萃四方百貨之所聚
其民易以棄本逐末制名甸服示天下以務本重
穀也 周證先王之有天下也規方千里以爲甸
服以供上帝山川百神之祀以備百姓兆民之用
以待不庭不虞之患其餘以均分公侯伯子男使
各有寧宇以順及天地無逢其災害 釋名曰四
丘爲甸甸乘也出兵車一乘也 鄭玄詩箋云六

十四井爲甸甸方八里居一成之中成方十里出
兵車一乘以爲賦法 孔穎達曰知六十四井爲
甸者小司徒云四井爲邑四邑爲丘四丘爲甸如
數計之丘十六井甸六十四井也知方八里者以
孟子云方里而井則邑方一里丘方四里甸方八
里也孫毓云井邑丘甸出於周法 韋昭曰自商
以前并畿內爲五服周公因禹所弼除畿內更制
天下爲九服千里之內謂之王畿王畿之外爲侯
服侯服之外曰甸服

國語註

孔氏曰殷周稱畿唐

虞稱服周禮大司馬九畿方千里曰國畿職方氏
九服方千里曰王畿漢志周因井內而制軍賦地
方一里爲井井十爲通通十爲成成方十里十成
爲終十終爲同同方百里同十爲封封十爲畿畿
方千里提封百里蔡邕獨斷曰天子所都曰京師

京水也地下之衆者莫過于水地上之衆者莫過
于人京大師衆也故曰京師也又曰京師天子之
畿內千里象日月日月躔次千里 張氏曰服服
其事也內而甸侯綏外而要荒莫不各服其事於

天子故皆謂之服

傳甸服內之百里近王城者禾稊曰總入之供飼國馬疏總者總下銍枯禾穗與稊總皆送之周禮掌客待諸侯之禮有芻有禾此總是也傳銍

刈謂禾穗

疏劉熙釋名云銍穫禾鐵也說文云

銍穫禾短鎌也詩云奄觀銍刈用銍刈者謂禾穗也傳枯稊也疏郊特牲云莞簟之安而稊枯

之設於此言服明上下服皆並有所納之役也四百里內猶尚納粟此當稊粟別納碧梧馬氏曰

先儒多以服字就秭字解若去禾中之粟米而納空藁惟使之服輸將之事是其賦輕於四百里五百里矣若存禾中之粟米而又納藁又服輸將之事是其賦重於百里二百里矣惟蔡傳摘出服字以爲總前二者言之

金氏曰有殼曰粟無殼曰米總納繁重故惟百里之內納之若二百里則去總而納銍四百里則簡銍而納粟五百里又遠則去殼而納米近者重而遠者輕重者艱而輕者精賦皆什一力則以遠近

輕重爾又曰古人九數有粟米均輸二法蓋本于此然獨三百里之民納粟而不粟視他處爲甚輕而有服役之事焉服役獨在三百里者蓋酌五百里之中爲轉輸粟米之賦也四百里粟五百里米不言賦納蓋使三百里之民轉而輸之于都爾夫三百里之民受遠郊之米粟而爲轉輸力若勞而賦則省又以見古者賦役不兩重此帝王之良法而萬世之所當行也 管子曰民事農則田墾田墾則粟多粟多則國富國富者兵強兵強者戰勝

戰勝者地廣先王知衆民強兵廣地富國之必生
於粟也故禁末作止奇巧而利農事又曰辟地廣
而民不足者上賦重流其藏者也故粟行於三百
里則國無一年之積粟行於四百里則國無二年
之積粟行於五百里則衆有饑色 商子曰粟生
而金歿粟歿而金生國好生金於境內則金粟兩
歿倉府兩虛國弱國好生粟於境內則金粟兩生
倉府兩實國強 鼂錯曰欲民務農在於貴粟貴
粟之道在於使民以粟爲賞罰神農之教曰有石

城十仞湯池百步帶甲百萬而亡粟弗能守也

(億)所納精者少麤者多 朱子曰近麤而遠精近

者易致遠者難致也畿內不封諸侯故田賦入天子又曰里者道塗遠近之數非方井之里也 鄭

氏曰禹貢九州貢篚雖非四夷之獻亦以服食器

用爲要而冀州獨不言貢篚蓋畿甸之內賦其總

銍秸粟米也總銍秸粟米者倉廩之儲糗糧之濟

是食爲土貢之要也兗州之貢蠶絲豫州之貢絺

紵其地則密邇畿甸焉是衣服之用亦爲土貢之

要也自服食外器用次之器用外不過寶玉玩好而已帝王建都必擇衣食之地而謂之京師京大師衆也言天子之居旣衆且大非衣食之豐不可以爲國也若夫大賂南金犀革象齒珠貝之類非服食器用之物貴其土產也皆遠於畿甸而或貢於要荒之服焉苟帝王以爲貢篚之要國家所急則堯舜之都遷於荆梁久矣其肯以冀爲都區區禦大河之患圖一日之安耶及周之衰荆揚陷於吳楚貢金不入而天王求之於魯蓋以魯通於吳

也是豈聖人制貢之初意哉 呂東萊曰古者天子中千里而爲都公侯中百里而爲都天子之都東西南北所貢入者不過五百里諸侯之都所貢入不過五十里所以三代之前漕運之法不備雖如禹貢所載入于渭浮于江之類所載者不過是朝廷之路所輸者不過幣帛九貢之法漕運未甚講論到春秋戰國爭事攻戰所論者尚只是行運之漕秦并諸侯罷五等置郡然後漕運之法方詳秦運天下之粟輸之北河是時蓋有三十鍾致一

石者 蘇轍曰今東南之米每歲邇汴而上以石計者至五六百萬山林之木盡以舟楫州郡之卒獎於道路月廩歲給之卒不可勝計往返數千里饑寒困迫每每侵盜雜以它物米之至京師者率非全物矣

箋按禹制甸服獨詳於田賦天子取畿內以自贍重本力穡旣風天下以務農而京坻之積不煩仰給外藩亦足以壯根本而消窺伺聖人防漸之意微矣自漢都關中漕轉關東粟以給中都官歲不

過數十萬石其後漕穀至四百萬斛用卒六萬人
所在騷動唐全倚辦江淮然太宗以前運粟關中
不過二十萬石是時府兵之制未壞也至玄宗時
韋堅歲漕粟四百萬石大盜繼起而漕事亦復溢
觴宋開寶初運江淮米數十萬石以給兵食寢假
而汴河歲漕至六百萬石蓋並不講於甸服之義
而集游惰於京師虛口坐食以致王畿之重全倚
漕運爲咽喉如人一日食不下咽其就斃可跂而
待 國朝定鼎燕薊卽古冀州之墟先年有議興

西北水利者開墾卒鮮實効而沿唐宋前輒歲漕
東南粟四百萬石以爲常然西山一帶多有水田
遺址而頃歲天津增墾彌望禾黍是開墾未嘗無
利也似宜專置勸農之官多方設法開渠履畝以
廣積貯一則可省飛輓之勞一則可限戎馬之足
而根本重地不至全仰給東南以釀意外之變所
裨益豈淺哉蘇秦說燕亦云粟支二年且謂民雖
不田作而棗栗之實足食於民今神京實古燕地
而樹藝園莽緩急百無一備曷不講先王甸服遺

制云 九州之內別爲五服此皆禹敷土事 丘
氏潛曰虞夏之世天子之田止於畿內所謂五百
里四方相距各千里也田賦之入止于米粟近地
則并其本稔取焉蓋米以食人藁以飼馬無非以
爲國用也然其取之因地遠近各有輕重之等精
麤之異非若後世槩無分別焉又曰漢唐都長安
宋都汴梁皆去邊遠我 朝都燕則自以都城爲
北邊捍蔽北最近而東次之西又次之南爲最遠
焉請如漢唐宋故事立爲輔郡以宣府爲北輔因

其舊而加以番守之事俾守國之北門其東也以
永平爲輔以守松亭一帶關隘及扼遼左要害其
西也以易州爲輔

或真定

以守紫荊一帶關隘其南

則以臨清爲輔坐鎮牒河而總扼河南山東之衝
又自此而南屯兵于徐州以通兩京之咽喉每處
屯重兵一二萬量其輕重緩急以多寡其數罷兩
直隸河南山東上京操備班軍因地屯守以爲京
師之屏蔽遇京師有事調發則國家省轉輸之勞
邊方足備禦之具矣 王氏樵曰古者天子之制

地方千里不如是不足以待諸侯然而粟米之輸
近取諸甸而已足而無仰于外後世轉輸外郡而
京師習于坐食元人爲歲漕不至始經營京東海
田城門一不開貴人無所得食抱珠玉而歿可爲
明監也

五百里侯服百里采二百男邦三百里諸侯

傳甸服外之五百里斥侯而服事

蘇傳此五百

里始有諸侯故曰侯服 蔡邕曰侯者侯也侯逆
順也男者任也立功業以化民 孔穎達曰人君

賜臣以邑令采取賦稅謂之采地一運曰諸侯有
國以處其子孫大夫有采以處其子孫是謂食邑
爲采地 何休公羊註曰所謂采者不得有其土
地人民采之取其租稅爾禮記王制曰天子三公
之田視公侯卿視伯大夫視子男元士視附庸
周官任土之法以家邑之田任稍 都之田

任縣地以大都之田任疆地家邑大夫之采地所

家削小都卿之采地邦縣大都公之采地王子弟

所食邑也邦都顏師古曰采官也因官食地故曰

采地爾雅曰采寮官也 張氏載曰采地所得亦

什一之法其餘歸諸天子所謂貢也諸侯卿大夫
采地必有貢貢者必於時享天子皆廟受之此所
謂幣餘之賦也又曰卿大夫采地圭田皆以爲永
業所謂世祿之家 呂氏曰采邑如今之職田言
男則子在其間言侯則公伯在其間 呂祖謙曰
周禮一曰牧以地得民二曰長以貴得民牧是畿
外諸侯世世襲爵長是畿內諸侯世世受采地
韓嬰曰古者天子爲諸侯受封謂之采地百里諸

侯以三十里七十里諸侯以二十里五十里諸侯以十里其後子孫雖有罪而紂使子孫賢者守其地世世以祠其始受封之君此之謂興滅國繼絕

世也

詩傳

傳男任也任王者事

疏言邦者見上下皆是諸

侯之國 朱子曰第二之百里爲男爵之國三百

里謂自三至五爲百里者三隨文生例

蘇傳男

邦小國自三百里以徃皆諸侯也諸侯大國次國也小國在內依天子而國大國在外以禦侮也

陳傳良曰古者建國率小大相維其邊國皆大國也故寰內則以家邑小都大都爲中外之差寰外則以諸男諸子諸伯諸侯諸公爲中外之差禹貢侯服正此說也 楊簡曰古者王畿千里天子所自治者不過千里餘皆侯國後世人主德不逮禹湯文武而統理四海之內宜其治不及古 白虎通曰諸侯封不過百里象雷震百里所潤雨同也雷者陰中之陽也諸侯象也諸侯比王者爲陰南面賞罰爲陰法雷也七十里五十里差德功也

箋記稱殷因夏爵三等公侯伯也周更立五等之爵增以子男今此曰男邦則夏時固有男爵矣禮記疏云案孝經夏制而云公侯伯子男是不爲三等也 王氏樵曰采案孔氏曰供王事正義曰事謂役也有役則供不主于一故但言采今蔡氏以采爲卿大夫采地然周制家削邦縣俱在畿內夏制雖不可考要之采地恐不及畿外也

五百里綏服三百里揆文教二百里奮武衛

傳綏安也侯服外之五百里安服王者之政教

疏要服去京師已遠王者以文教要束使服此綏服路近言安服王者政教以示不待要束而自服也釋詁訓揆爲度以王者有文教此服諸侯揆度王者政教而行之必自揆度恐其不合上耳內文而外武故先揆文教後言奮武衛奮者在國習學兵武有事則征討夷狄 陳氏大猷曰綏服內安中國外安邊疆也內三百里非全無武衛以文教爲主外二百里非全無文教以武衛爲主文教以善其生武衛以護其生民斯安矣又曰武以衛言

保護而已治世武事易弛故奮以脩之 林之奇
曰漢魏使外夷入居中國障塞之地至西晉有劉
石之禍石晉以盧龍賂契丹至重貴有耶律之難
綏服嚴華夷之辨萬世不易之法也

箋此節揆字奮字俱下得妙揆者揆度時宜之謂
文教曰揆則無窒碍之患武教曰奮則無廢弛之
虞 王者之施政教總以安靖爲主文武並用一
張一弛正安民之務也 丘氏濬曰禹貢五服之
制內而甸侯二服爲華夏之地外而要荒二服爲

夷狄之區而綏服居乎其中則介華夷之間也就此一服而言文治內武治外辨之於微防之於豫五百里要服三百里夷二百里蔡

傳綏服外之五百里要束以文教 周語蠻夷要服韋昭解云要者要結好信而服從之

傳夷者守平常之教事王者而已蔡法也法三百里而差簡鄭注云蔡之言殺滅殺其賦 蘇傳夷雜夷俗也故有罪曰蔡春秋傳曰殺管叔而蔡蔡叔

要荒二服列於武備之外皆邊地也王者不治
夷狄曰夷曰蠻不以中國之治治之流蔡所謂遶
諸四夷 王氏樵曰要服一說如裳之有要所以
綱統四裔 胡氏瓚曰春秋淮夷會申杞自降爲
子用夷禮夷亦國也

五百里荒服三百里蠻二百里流

傳要服外之五百里言荒又簡畧

疏王肅云政

教荒忽因其故俗而治之鄭云蠻者聽從其俗羈
縻其人耳蠻之言縈也以繩束物之名王肅云蠻

慢也禮儀簡慢 王氏曰夷易也無中國禮法易

而已蠻慢也甚於夷矣 **疏**流如水流其俗流移

無常政教隨其俗

馬融曰流行無城郭常居

箋要服可以要結爲戎索也荒則荒忽無常不可

以人情測度矣 胡氏瑣曰春秋執蠻畀楚而楚

爲荆蠻亦國也流卽所謂流共工于幽洲也

馬氏曰甸侯綏爲中國要荒已爲夷狄聖人之治

詳內畧外觀五服名義可見治中國則法度宜議

治以必治也治夷蠻則法度宜畧治以不治也觀

至于五千見德化之遠及觀要荒二服見法度之不泛及聖人不務廣地而勤遠畧可見矣

傳凡五服相距爲方五千里

疏凡五服之別各

五百里是王城四面面別二千五百里四面相距爲方五千里也鄭玄以爲五服服別五百里是堯之舊制及禹弼之每服之間更增五百里面別至于五千里相距爲方萬里禹之功在乎治山川不在拓境廣土土地之廣三倍於堯而書傳無稱也則鄭玄創造難可據信周禮王畿之外別有九服

服別五百里是爲方萬里又地理志言漢之土境
東西九千三百二里南北萬三千三百六十八里
驗其所言山川不出禹貢之域而里數異者尚書
所言據其虛空鳥路方直而計之漢書所言乃謂
著地人跡屈曲而量之所以數不同也 鄭氏詩
箋云周公致太平敷定九畿復夏禹之舊制正義
曰五服者堯之舊制也五服距面至二千五百里
四面相距而其方五千里禹旣敷土廣而弼之故
爲殘數居其間今以弼成而至於五千里四面相

距乃萬里焉大司馬職以九畿之藉施邦國之政
職方千里曰國畿外五千里爲疆有分限者九則
四面相距其方萬里此周公致太平制禮所定

左傳正義曰周公斥大九州廣土萬里制爲九服
邦畿方千里其外每五百里謂之一服侯甸男采
衛要六服爲中國夷鎮蕃三服爲夷狄大司馬謂
之九畿言其有期限也大行人謂之九服言其服
事上也 易氏曰禹之五服則計其一面之數周
之九服則計其兩面之數禹之甸服千里而止言

五百里是計其一面者也周之王畿與禹之甸服
同不言五百里而兼言千里是計其兩面之相距
者也蓋禹之五服王畿在內王畿千里而兩面各
五百里數其一面故曰五百里甸服自甸服至荒
服皆數其一面每面各五百里總爲二千五百里
兩面相距則凡五千里職方氏所載則王畿不在
九服之內自方五百里之侯服至於方五百里之
蕃服其名凡九九服每面各二百五十里通爲二
千二百五十里兩面相距則通爲四千五百里并

王畿千里則通爲五千五百里其增於禹者五百里之蕃服耳然周之蕃服雖不列於禹貢九州之外而禹貢九州之外咸建五長東漸西被卽成周蕃服之域是周之蕃服其名雖增於禹而其地未嘗增也 吳萊曰黃帝方制萬里畫野分州得百里之國萬區然以禹貢九州計之五服相距方五千里僅得黃帝之半說者且疑九州之外黃帝亦嘗畫野分州舜之十有二州亦猶此也然周禮自王畿而次之別有九服服別五百里方而計者則

爲萬里漢地理志乃紀山川與禹貢不異而里數
縣絕或曰尚書據虛空烏路漢志著人跡屈曲或
曰禹聲教所及地盡四海其疆理制止五服若夫
荒服之外又有區畫者存非若周漢盡其地之所
及而疆理之也何以言之王制四海之內截長補
短方三千里是天子壤地之實也故周禮雖稱九
服周官止曰六服羣辟又曰六年五服一朝是則
侯衛以降聖人雖制之服而不必其來若職方氏
掌天下之圖辨其邦國都鄙必兼夷衛之初封人

民氏族土田分器至詳至悉未有一言及附庸者
然又有一說焉夫冀禹之所都冀之北境自雲中
九原二千五百里且至于沙漠不毛之地周之東
遷洛陽爲土中曹去王城八百里猶在甸服鄭在
河南密縣百七十里已爲男服蓋曹順流極便而
鄭則成臯虎牢之險夫豈五服之制非若畫棋局
然以定遠邇也是故幽州邇於碣石而共工流蒼
梧遠於衡山而虞舜狩 章俊卿曰先儒鳥道之
說竊以爲不然嘗討之王制古者百里當今百有

二十一里今謂漢也是禹貢五千里之制卽漢之六千里也况五服之制據萬里而言合以東西四正爲據當時堯都平陽正東至東萊之海才二千八百里正西至張掖之流沙才三千三百里是併可以滿五服之制也兩漢九千里之制則以遼東之海與燉煌之流沙而言遼東在東北隅燉煌在西南隅非其正也夫正方一尺者袤之而度其兩隅則爲尺有四寸而竊則五服之制舉其隅而度之宜其九千里也漢制南北萬五千里者舉朔方

日南而言而禹貢所屈正南止及衡山之陽而日南又在衡山之南八千餘里非禹迹所及也至平陽之北不盈千里已爲戎狄之地是五服之制唯東西南三方爲然北方僅滿二服而已尚何鳥道之云乎九州四正雖近四隅實遙五服之制乃舉其近蓋不欲以一時廣大之名啓後世無厭之禍也 曾氏曰周之王畿卽禹之甸服侯服甸服卽禹之侯服男服采服卽禹之綏服衛服介於其中卽綏服之奮武衛蠻服夷服卽禹之要服鎮服蕃

服卽禹之荒服也 羅泌曰虞夏之前四正疆理
東止瑯邪之海西積石之河五千而縮南至衡山
北泊單于府五千而贏使皆封建百里之國惟堪
二千五百縱并遼東渤海長城外盡契丹高句驪
積石塞黑水靺鞨流沙之地亦不能五千國況古
百里當今百二十一里六十步烏有所謂萬區百
里國哉蓋古嘗有萬國之制而非皆百里也故呂
覽言神農封建彌近彌大彌遠彌小海上乃有十
里之邦以大運小要使臂使指者而孔子亦曰安

見方六七十如五六十而非邦者然則古之萬國
從可知矣孟子曰海內之地方千里者九古之天
下方三千里正矣五千里者古今衰盛山川萊蕪
之通數也周世九服號七千里而職方藩畿爲方
萬里斯亦未記之數王畿所止亦曷嘗千里哉周
之西都今之關中而東都則洛陽也二都地踞南
山之陰北山之陽東西長南北短短長相補猶不
能以千里今古不變而禮王畿四方相距爲二方
千里遠郊近郊甸地稍地小都大都率相距爲百

里所能容哉固知畿服諸說有匪圓通上世必有
陰補相乘之道爲疆理之定制者

箋謹按禹貢九州以今天下地圖參之兩直隸卽
冀揚徐之域此外爲山西山東江西湖廣河南四
川陝西七省地耳震澤稍鄰浙西而閩廣雲貴並
未入版圖則國家拓地固已侈於禹服矣乃文
法日煩而武衛浸弛飛輓之轉輸欲竭東南久苦
不支而要荒之界限漸敝西北更虞多事明先王
五服之制而申畫郊圻安內攘外尚得泄泄以來

噬臍之悔哉 王氏樵曰周禮大行人邦畿方千里其外侯服甸服男服采服衛服要服各方五百里要服蠻服也此以上爲九州之內又有夷服鎮服蕃服在九州之外內六服去王城三千五百里相距七千里與禹服不同考周地幅圓蓋不廣于禹立政言方行天下陟禹之迹則亦以禹迹爲極爾蓋禹時四方有不盡之地聽四夷居之故五服止于五千周則盡禹迹所至而疆畫之是以不同爾 胡氏瓚曰合五節見詳內畧外意甸服天子

畿內之地故什一使自賦而八州以錫土又必定其則以爲之式恐如後世有稅畝丘甲者所謂經界正而穀祿平也若貢皆達于天子諸侯歲貢土亦謂之貢周衰求車求金而包茅不入致勤召陵之師則齒革之車三命之金菁茅之縮酒貢非一日矣又封契于商封稷于邰商在亳邰後遷周則雍豫沃壤天子已不自有而公天下之大端太本也

東漸于海西被于流沙朔南暨聲教訖于四海禹錫

玄圭告厥成功

傳此言五服之外皆與王者聲教（疏）海多邪曲

故言漸入流沙長遠故言被及皆是過之意也鄭

玄云南北不言所至容踰之 林氏曰此又推聖

化所極至而言之漸如水之漸漬被如衣之被覆

朔南不言所至以下文四海見之也 列子曰渤

海之東不知幾億萬里有大壑焉實惟無底之谷

名曰歸墟 爾雅云九夷八狄七戎六蠻謂之四

海釋名曰海晦也主承穢濁其水黑如晦也

鄭氏詩箋

云言去中國險遠稟政教昏昧也
孫炎曰海之言晦晦闇於禮儀也

博物志云天

地四方皆海水相通地在其中蓋無幾也七戎六
蠻九夷八狄形類不同總而言之謂之四海言皆
近於海也四海之外復有海云 淮南子曰有聲
之聲不過百里無聲之聲施於四海 賈捐之曰
四海欲與聲教則治之不欲與者不強治也 湯
問於夏革曰四海之外奚有革曰猶齊州也湯曰
汝奚以實之革曰朕東行至營人民猶是也問營
之東復猶營也西行至闡人民猶是也問闡之西

復猶爾也朕是以知四海四荒四極之不異是也

列子

北邊備對曰四海邊中國者在山東爲東海

在廣南爲南海人人聞見若禹迹所及西境流沙而極不言西海東北嘗至碣石而北海之名不著于經漢武帝事遠西北二海遂有身歷之者條支之西有海焉先漢使命嘗及之而入史矣後漢班超又嘗遣甘英輩親至其地至於西海之西又有大秦即波斯者焉若北海則又甚遠霍去病封狼居胥山其山實臨瀚海者北海也蘇武郭吉皆爲

匈奴所幽冀諸北海之上而唐史載突厥部北海之北更有所謂骨利幹之國在海北岸然則詩書所稱四海者環夷夏而四之若夫西北二虜有西海柏海青海蒲類海蒲昌海居延海曰亭海鮮水海皆嘗並海立稱其實衆水鍾爲大澤如洞庭彭蠡之類借海名之非真海也李吉甫辨白亭海而曰河北得水便名爲河塞外有水便名爲海其說確矣 朱子曰自古無人窮至北海緣北邊地長其勢北海不甚濶地之下與地之四邊皆海水周

流地浮水上與天接天包水與地 洪邁曰海一而已地之勢西北高而東南下所謂東北南三海其實一也北至于青滄則云北海南至于交廣則云南海東漸吳越則云東海無由有所謂西海者詩書禮經所載四海蓋引類而言之漢西域傳所云蒲昌海疑亦渟居一澤爾班超遣甘英往條支臨大海蓋卽南海之西云 吳澂曰禹貢叙事至訖於四海而止訖者地之盡處也海之環於東南西北相通也而西海北海人所不見何也西北地

高或踞高窺下則見極深之壑如井沉沉然者蓋
海云東南地卑海水旁溢不啻萬有餘里中國之
地廣輪萬三千里耳而東連海岸以勾股稽之水
之所浸倍於中國之地者二十而羨其間洲島國
土不可勝窮若三神山者蓋不知其幾也

元史

地理志有天下者漢隋唐宋爲盛然幅員之廣咸
不逮元漢梗於北狄隋不能服東夷唐患在西戎
宋患常在西北若元則起朔漠併西域平西夏滅
女真臣高麗定南詔遂下江南而天下爲一故其

地北踰陰山西極流沙東盡遼左南越海表蓋漢東西九千三百二里南北一萬三千三百六十八里唐東西九千五百一十一里南北一萬六千九百一十八里元東南所至不下漢唐而西北則過之隋東西九千三百里南北萬四千八百十五里東南皆至於海西至且末北至五原見地理志王制西不盡流沙南不盡衡山東不盡東海北不盡恒山應氏曰東海在中國封疆內西南北海則遠在夷徼之外南獨以江與衡山爲限蓋百粵未盡開也惟河舉東西南北河流縈帶中國也自

秦以上西北袤而東南蹙自秦以下東南展而西
北縮此古今天地之大運也當先王時四方各有
不盡之地聽夷居之不勞中國以事外也

傳玄天色禹功盡加於四海故堯賜玄圭以彰顯

之言天功成尚書旋璣鈴曰禹開龍門導積石

出玄珪刻曰延喜玉受德天錫佩

禹功既成天出玄珪以錫之古

者以德佩禹有治水功故天佩以玄玉

蔡傳水土既平禹以玄圭

爲贊而告成功于舜也水色黑故圭以玄云

方勻曰越

州禹廟元士饋藏之色黑如磬徑五尺厚寸餘而好相信上下郡將掌封鑿

遁甲開

山圖云禹至會稽得赤珪如日碧珪如月 禮緯

稽命微云天命以黑故夏有玄圭天命以赤故周
有赤雀衡書天命以白故殷有白狼衡鉤

蘇傳

以五德王天下所從來尚矣黃帝以土故曰黃炎
帝以火故曰炎禹以治水得天下故從水而尚黑
殷人始以兵王故從金而尚白周人有流火之祥
故從火而尚赤湯用玄牡蓋初克夏因其舊也詩
云有客有客亦白其馬是殷尚白也帝錫禹以玄
圭爲水德之瑞是夏尚黑也此五德所尚之色見

于經者也 羅泌曰黃帝之世天先見大螻大蟪
黃帝曰土氣勝土氣勝故其色尚黃其事則土及
禹之時雨金機陽禹曰金氣勝金氣勝故其事用
金然其受命荷帝玄玉故其色尚黑下至湯代金
亦先生於水湯曰金水勝金水勝故其色尚白其
事則水及夫武王火烏流社武王曰火氣勝火氣
勝然其衰在木火生于木故其色尚赤其事則木
〔箋〕聲教訖于四海卽禹謨文命敷于四海也四海
會同之餘聲教遠播而比屋向風承德此之謂不

距朕行 地平天成禹功可謂成矣帝曰成允成
功世稱神禹功與天地並有以也而祇台德先實
爲成功之根抵故曰禹之明德遠矣 按秦本紀
曰大費與禹平水土已成帝錫玄圭禹受曰非予
能成亦大費爲輔帝舜曰咨爾費贊禹功其錫爾
皐游大費拜受是爲柏翳蓋謂玄圭爲帝錫禹論
衡曰禹母吞薏苡將生得玄圭遯甲開山圖曰禹
遊於東海得玉珪碧色長一尺二寸圓如日月以
自照達幽冥並附會之詞不足據也 丘氏濬曰

中國之地南北比東西爲遠故禹貢言聖人聲教之所及於東曰漸於西曰被皆指其地言而於南北則止曰暨可見聖人嚮明之治自北而南日拓而遠不可爲限量也東漸于海海之外地盡矣西被于流沙流沙之外猶有地焉漸如水之漸漬底于海者也被則如天之無不覆被天所覆被處聖人之化皆可至也其風聲教化雖曰無遠不及亦惟止于海而已然其所以漸被暨及者風聞之聲神化之教使之聞而振動未嘗體國經野以內治

治之也此無他天地間有大界限華處乎內夷處乎外各止其所而天下之理得矣又曰中國之地在三代不出九州之外惟揚徐青冀四州濱海而已四海惟東北濱中國而南海北海則越在荒服之外自漢以後南越始入中國而有南海然西海竟不知所在故今祀東海于登州祀南海于廣州二祀皆臨海而祭西海則望祀于蒲州北海則望祀于懷慶今日建都于燕徃南而祭北海豈天子宅中之義哉古謂青州爲北海郡青去登不遠猶

以是名今京師東北乃古碣石淪海之處於此立
祠就海而祭爲宜況今北鎮醫無閭山在於遼海
山旣可以爲北鎮川獨不可以爲北海乎若夫中
國之正西在於秦隴西南則蜀稍南則滇也滇之
之極西百夷之外聞有大海通西南島夷此地
前代未入中國今旣爲羈縻之地則王化之所及
也宜于雲南望祀之 王氏樵曰禹時五服止于
五千則五嶺之南當在荒服之外此記聲教所及
云朔南暨朔朔方南交趾也則聖人制五服雖止

于五千而威德所被已方制萬里矣 鄭氏曉曰
天地華夷之界真有意大漠限北狄流沙限西戎
滄海限東夷谿嶺限南蠻然中國自漢武以來南
境漸闢西北境漸盛東如故又曰朔南暨句斷漸
深於被被遠於暨當時輿圖廣袤之勢然也朔卽
朔方南止於荆揚彭蠡震澤之間當時江浙湖廣
廣東雲貴未入版圖 胡氏瓚曰禹貢四海止就
禹迹所及言之河濟入北海江淮入東海黑水入
南海弱水當入西海 楊慎曰東海之別有渤海

南海之別有漲海西海之別有青海北海之別有
瀚海猶五嶽之外有五鎮也又曰今滇西百夷之
外有大海在今阿瓦地卽西海無疑矣 李贄曰
丘文莊謂自南越入中國始有南海而西海竟不
知所在余謂禹貢言聲教訖於四海者亦只是據
兄在經歷統理之地而紀其四至耳所云四海卽
四方也故又曰四方風動則可見矣豈真有東西
南北之海如今南越之海的然可覩者哉又據見
在四方論之四川天下之正西也雲南天下之西

南陝西則天下之西北一正西一西北一西南皆
不見有海也由陝西而山西據大勢則山西似直
正北之域矣而正北亦無海也唯今薊遼鄰山東
始有海從此則山東爲東方之海山東抵淮揚蘇
松以至錢塘寧紹等處始爲正東之海東甌至福
建則古閩越地也稍可稱東南海矣廣東卽南越
地今其治爲南海郡盡以爲正南之海矣不知閩
廣壤接亦僅可謂之東南海耳由此觀之正西無
海也正北無海也正南無海也西北西南以至東

北皆無海則僅僅正東與東南角一帶海耳又豈
但不知西海所在邪且今天下之水皆從西出西
水莫大於江漢江有四有從岷來者有從沱來者
有從黑白二水來者漢有二有從嶓冢來者有從
西和徼外來者此皆川中之水今之所指以謂正
西是也水又莫大于黃河黃河經過崑崙崑崙乃
西番地是亦西也雖雲南之地今皆指以爲西南
然雲南之水盡流從川中出則其地高于川中可
知矣高者水之所瀉流之所始而東南一海咸受

之則海決在下流之處雲南四川山陝等去海甚遠皆可知也雲南川陝之外其地更高又可知也不然何以不川流而西往彼西海而乃迢遞逶迤盡向東南行邪則知以四川爲正西者亦就四方之勢槩言之耳今雲南三宣府之外有過洋濶機大布道自海上來者此布我閩中常得之則雲南旋遶而東又與福建同海則雲南只可謂之東南而不得謂之西南又可知矣吾以是觀之正南之地尚未載之輿圖况西南邪故余謂據今人所歷

之地勢而論之尚少正南與西南正西與西北正
北與北東諸處者以不見有海故卜之也以天下
三大水皆從川中出卜之而知其難以復尋西海
于今之世也西海旣不可尋則又何名何從而祀
海也然則丘文莊欲祀北海于京之東北楊升菴
欲祀西海于滇之西南皆無義矣王可大曰中
國地形南濱於海則吳越閩廣是也東連朝鮮之
東亦有海西通西域大宛月氏大食諸國大食之
外亦有巨海大食之西有國不可勝數大食陀盤

所可至者惟木蘭皮耳自陀盤地國發舟正西涉

海百日而至 曹昭曰禹玄圭象水色圭古作珪

瑞玉也上圓下方以象天地以封諸侯

格古要論

王

氏樵曰上之與下謂之錫禹奉玄圭而云錫者何

也蓋爲舜成百世之功不可以常辭書猶之舉舜

而曰師錫蓋爲天下得人亦非常之事也又曰首

曰禹敷土終曰禹錫玄圭告厥成功只起結二禹

字而中間數千言貫串相應文之妙也

陳氏大猷曰自禹敷土而下緊舉治水規模言之

自冀州而下以帝都爲主自東而西區別九州之
疆域言之自導畧而下則自西而東貫串九州之
山水言之自九州攸同而下則總合九州成績言之
之自五百里甸服而下則以成五服自內及外言之
之自東漸而下則逮舉四極言之以至于告成功
而終焉 許氏曰禹貢專爲紀治水之成功而併
及貢賦之數故九州紀水道土色田賦之等貢物
貢道爲詳餘皆或見或不見古史言簡而意密則
又有言外之意惟冀梁雍言山獨詳諸州不言者

天下之勢西北高而多山故也徐雖言山乃蒙羽
之小者又止言藝則不專主于導山冀青梁不言
澤者冀梁多山而地峻青邊海而水易洩故二州
無澤也雍雖多山而豬野在其西北之偏黃河之
外地形稍下故有之也揚荆豫梁不言原隰者諸
州有大澤者無原隰有原隰者無澤揚州彭蠡太
湖其浸甚大荊州雲夢濶數百里豫之滎波菏澤
孟豬皆巨浸則原隰之地固少矣竟徐雍二者皆
有者竟止言宜桑之土耳而雍州豬野在河外原

隰在河內相去甚遠惟徐之東原不同東原地甚
卑常有水患雖曰原其實下濕謂居沛之東而稍
高爾梁州二者皆無者爲多山而下不足豬水且
無曠平之地也梁雍無篚者多山之地惟出獸皮
而所織爲罽不假于篚也兗荆豫不言夷者凡地
接于山海邊陲之地則有夷豫居天下之中荆雖
居于南而禹貢之地不踰嶺兗雖在東北而其東
南則接青徐西北皆冀境故三州無夷也兗徐揚
獨言草木者三州在東方皆河淮江之下流被水

特甚草木不生今水旣洩而生草木故特書此以表地平也至于冀之不言境域及貢篚則傳已言之矣 金氏曰天地常形固相爲句連貫通然其條理亦各有脉絡若以脉絡之可見者言之崑崙四垂而爲海天下諸山皆起于崑崙而崑崙無定名地之最高山之所聚江河諸源之所出卽崑崙爾崑崙之上綿亘糾繆句連盤錯其南爲岷山而岷山最大其北爲積石諸峯其東爲西傾朱圉鳥鼠諸峯其西北諸山尤爲綿亘紛錯河之所以北

弱水之所以西黑水之所以南皆是也惟江淮河漢行乎中國自崑崙而東北言之則自積石而北爲湟水星海青海以至浩亶皆河源也入匈奴以東爲陰山又東南自代北雲朔而南趨爲北岳以至太行爲北之脊壺口雷首太岳析城王屋皆其羣峯河之折而南汾晉諸水之所以西入河涿易漳滹恒衛之所以東入海也分而東趨者行幽燕之北爲五關之險以至營平而爲碣石此北絡也自崑崙以東言之則東爲西傾而洮水出其北入

河桓水出其南入江又東爲朱圉鳥鼠諸隴則爲渭之源自渭源以北卽夾河源而北以東若岍岐若荆山諸峯涇水漆沮諸源也自渭以南卽西傾而下諸峯亘爲終南屹爲泰華東北爲穀陝東南爲熊耳外方伊洛之源又南爲桐柏淮源以達于淮西諸山此中絡也又自西傾朱圉而南分爲嶓冢漢源夾漢而趨者北則終南華熊諸隴南則蜀東諸峰說者謂蜀東諸山皆嶓冢正謂其岡岫綿亘爾又東則爲荆山內方此中絡之次也自崑崙

之東南言之是爲岷山江源夾江而東者北支則
西傾以南嶠冢以西之脉爲恒水西漢水嘉陵江
諸源其南支卽南趨爲蒙蔡諸山青衣大渡馬湖
江諸源又東包涪黔一盤而北爲三峽其東出者
包絡九江之源中盤中爲衡山其再盤而北爲廬
阜其嶺之東出者又爲袁吉章貢盱信諸山之源
至分水魚梁嶺三盤而北過趨新安峙天目盡昇
潤凡再盤之間其水聚爲洞庭三盤之間其水聚
爲彭蠡三盤以東則南爲閩浙北爲震澤此南絡

也惟泰山則特起東方橫亘左右以障中州此所以爲異與大抵水者山之液故山盤而水之源出焉此所以聚而爲川流之盛地道以句連爲固故山東而水之流壅焉此所以資于疏闢之功此其大約也

神禹別錄

禹跡猶存山川不改緬言千載懷古彌深旁搜夏
革之談不廢齊諧之志庶神遊於河洛亦義協乎
圖書豈曰愛奇聊當碎錄云爾吳興茅瑞徵述

帝禹夏后氏姁姓名禹一曰伯禹是爲文命

史路

太史公曰禹爲姁姓其後分封用國爲姓故有夏
后氏有扈氏有男氏斟尋氏彤城氏褒氏費氏杞
氏緡氏辛氏冥氏斟氏戈氏 按禹廟謚議云或
曰禹桀皆易名周人革民視聽故以行爲謚追夏

始祖與末王而加之夏商之世諱忌未行臣子呼
君父名無嫌猶朕尊卑得共稱之 羅疇老云禹
之功至水平而後大故於禹成厥功之後始稱大
禹

蜀郡廣柔縣有石紐鄉禹所生也

水經注

帝王紀云鯀妻脩已

一作脩紀

見流星貫昴夢接意感

又吞神珠薏苡胸折而生禹

蜀本紀云禹母吞珠孕之折副而生

路史云髀納有莘氏日志是爲脩已孕歲有二月
以六月六日屠 而生於鸛道之石紐鄉所謂割

兒坪者

董仲舒繁露云禹生於背

郡國志云石紐山在石

泉縣南帝王世紀以鯀納有莘氏胸臆折而生禹

於石紐郡人以禹六月六日生是日重脩裸享歲

以爲常括地志云茂州汶川縣石紐山在縣西

七十三里華陽國志云今夷人共營其地方百里

不敢居牧

按廣柔隋改曰汶川

開山圖注云女狄暮汲石

紐山下泉中得月精如鷄子吞之遂孕十四月生

禹

堯帝戊戌五十八載六月六日生禹

淮南子曰禹生於石高誘

注禹母脩已感石而生禹

隋巢子謂禹生崑石

史記索隱

曰按系本鯀娶有莘氏謂之女志

吳越春秋作女嬉

是生

高密

宋秉曰高密禹所封國

舊陝志曰鯀娶有莘氏女

今

陽生禹出于夏水

在今臨洮

長于西羌禹國號夏蓋因

所出夏水以為號也

張邦奇曰今按石紐鄉在

汶川縣境禹廟在茂州東門內蓋蜀國傳自昌意

娶蜀山氏女生帝嚳封其支庶於蜀斯禹所自生

也

禹身長九尺有只虎鼻河目齟齒鳥喙臣三扃戴成

鈴裏玉斗玉舄履已

史路

世紀云禹長九尺二寸

續博物志云長九尺九寸

列子曰夏

后氏蛇身人面牛首虎鼻

淮南子曰禹耳參漏

是謂大通姚氏云禹胸有墨如北斗荀子非相

篇曰禹跳湯偏楊朱曰大禹不以一身自利一

體偏枯

荀仲像稱禹十二爲司空

路史注云按舜攝時脩殛既成而禹用攝時蓋年

十四

禹娶塗山生啓

夏本紀

別錄

史記索隱曰按系本塗山氏女名女媧

連山易曰名攸女路

史云禹年三十取於塗山氏
三過是爲攸女歿葬陽城

呂氏春秋曰禹巡

省南土塗山氏之女候禹于塗山之陽乃作歌曰

候人兮猗實始爲南音 杜預曰塗山在壽春東

北皇甫謐云今九江當塗有禹廟則塗山在江南

寰宇記云古當塗國在濠州西一百十七里漢

爲縣屬九江郡晉屬淮南郡在壽春東北輿地記

謂卽禹所娶塗山氏國也

世紀云塗山氏合巽于台桑之野鍾離西七十里

里卽當

塗縣

華陽國志曰禹娶於塗山今江州塗山

帝禹之廟銘存焉山有禹王及塗后祠陶弘景水
仙賦云塗山石帳天后翠幙夏禹所以集羣臣也
按倦游錄三門禹廟神儀侍衛極肅後殿一毳裘
像侍衛皆胡人云是禹婦翁今不復存

寰宇記云
塗山在巴

縣東南
八里

水經注曰江水北岸有塗山南有夏禹

廟塗君祠廟銘存焉常璩庾仲雍並言禹娶於此
余按羣書咸言禹娶在壽春當塗 元賈元碑曰

華陽志云渝郡塗山禹后家也東漢郡志云塗山
在巴郡江州乃今重慶巴縣至今洞曰塗洞村曰

塗村灘曰遮夫后曰啓母復考禹生汶川生于蜀
娶于蜀古今人情不甚相遠先是帝曾大父昌意
爲黃帝次子娶蜀山氏生帝顓頊帝之娶蜀有自
來矣 呂氏春秋曰禹娶塗山氏不以私害公自
辛至甲四日復往治水故江淮之俗以辛壬癸甲
爲嫁娶日 吳越春秋曰禹三十未娶行到塗山
有白狐九尾造於禹禹曰白者吾之服也其九尾
者王之證也塗山之歌曰綏綏白狐九尾癯癯我
家嘉夷來賓爲王成家成室我造彼昌天人之際

於茲則行明矣哉禹因娶塗山謂之女嬌取辛壬
癸甲禹行十月女嬌生子啓路史云后趣生啓
及均塗山於是獨明教誨而致其化乃立庶子之
官嗟乎天下之命懸太子若塗山可謂知所本矣
河南通志曰嵩山之陽舊有啓母廟廟前有石高
二丈許而中裂號啓母石郡志載淮南子云啓母
塗山氏之女禹治洪水經轅轅山謂塗山氏曰欲
餉聞鼓聲乃來禹跳石誤中鼓塗山來見禹乃化
熊慙之而去嵩高山下化爲石禹曰歸我子石破

而生啓蓋此石此好事者承訛附會耳聞登封又有所謂啓母墓漢書注啓母墓在陽城卽嵩山之陽今登封地然則此石爲啓母此墓何爲者耶

考宋景濂遊塗山記云入禹會村有夏皇祖廟從廟西循石坡下巨石危立如人遙望之儼然一姬也呼爲啓母石則沿襲承訛又不止嵩山矣楊炯少姨廟記云漢地理志嵩高少室之廟其神爲婦人像故老相傳啓母塗山之妹更可爲千古笑端

禹學於西王國

荀子○楊倞註
西施之賢人也

呂氏春秋曰禹師大成贊又曰禹染於臯陶伯益

路史曰禹師於大成摯

新序作執

暨墨如子高

百成子高

學於西王懼

西王懼也

堯治天下伯成子高立爲諸

侯堯授舜舜授禹伯成子高辭諸侯而耕禹往見

之則耕在野禹趨就下風而問曰堯治天下吾子

立爲諸侯今至於我而辭之故何也伯成子高曰

當堯之時未賞而民勸未罰而民畏民不知怨不

知說愉愉其如赤子今賞罰甚數而民爭利且不

服德自此衰利自此作後世之亂自此始夫子盍

行乎無慮吾農事協而稷遂不顧

呂覽

禹受黑書於臨洮得綠字于濁水

路史

水經注曰禹西至洮水之上見長人受黑玉書

續博物志曰禹治洪水觀於河見白面長人魚身

出曰吾河精也授禹河圖而返於淵拾遺記曰

禹鑿龍門之山見一神虵身人面示禹八卦之圖

列于金版之上又有八神侍側乃探玉簡授禹長

一尺二寸以合十二時之數使並度天地禹卽執

持此簡以平定水土湘水記曰衡山南有岫嶺

峰高一千五百丈禹登此得金簡玉牒治水之書
其山上承翼宿鈴得鉤物故名山下據離宮攝統
火師故名嶺

禹聞宛委黃帝書乃吉濟封白馬三月庚子登覆鬴
探穴獲五符知治水要

路史

太霄琅書云夏禹於陽明洞感太上命繡衣使者
降授五符以治水檄召萬神後爲紫庭真人陽明
洞會稽也 遁甲開山圖曰禹治水至會稽宿衡
嶺宛委之神奏玉匱書十二卷 水經注云會稽

有石匱山石形似匱上有金簡玉字之書夏禹發
之得百川之理也 吳越春秋曰禹治洪水至牧
德之山見神人焉謂禹曰勞子之形役子之慮以
治洪水無乃怠乎禹知其神人再拜請誨神人曰
我有靈寶五符以役蛟龍水豹能傳之不日而就
因授禹而誡之曰事畢可秘之於靈山禹成功後
乃藏之於洞庭包山之穴 洞庭山記曰洞庭有
二穴東南入洞幽邃莫測昔闔閭使令威丈人尋
洞秉燭晝夜而行繼七十日不窮而反啓王曰初

入洞口狹隘僂僂而入約數里忽遇一石室可高二丈常垂津液內有石枕硯石几上有素書三卷持回上於闔閭不識乃請孔子辯之孔子曰此夏禹之書並神仙之事言大道也王又令再入經二十日却追之不似前也唯上聞風水波濤又有異蟲撓人撲火石燕黿黿大如鳥前去不得吏人姓毛名萇號曰毛公今洞庭有毛公宅石室并壇存焉 帝嚳時太上遣使齋靈寶真文授帝帝將仙封之鍾山至夏禹登位巡狩度弱水登鍾山遂

得靈寶真文禹未仙前復封之北嶽及包山洞庭
之室吳王闔閭出遊包山見一人自言姓山名隱
居入洞庭取素書一卷呈闔閭其文不可識令人
齋問孔子孔子曰丘聞童謠云吳王出遊觀震湖
龍威丈人山隱居北上包山入靈墟乃入洞庭竊
禹書天帝大文不可舒此文長傳百六初若強取
出喪國廬使者反白闔閭乃尊事之

禹以息土填洪水以爲名山

淮南子

淮南子曰禹之決瀆也因水以爲師又曰禹決江

疏河以爲天下興利而不能使水西流又曰禹身
執耒耨以爲民先剏河而道九岐鑿江而通九路
辟五湖而定東海 列子曰禹纂業事讐惟荒土
功此天下之憂苦者也 王嘉曰舜命禹疏山導
嶽偏日月之下惟不踐羽山之地 禹濟巨海則
鼉鼉爲梁踰嶢山則神龍爲馭又方治水時黃龍
曳尾于前玄龜負青泥于後故等聖而禹稱神焉
禹治水土迷而失塗濱北海之北其國名曰終
無風雨霜露不生鳥獸蟲魚草木當國中有山名

壺領狀若頰甄項有口狀若員環名曰滋穴有水湧出名曰神漢臭過蘭椒味過醪醴一源分爲四埒注水山下其俗倦則飲神漢力志和平過則醉經旬乃醒沐浴神漢膚色脂澤香氣經旬乃歇

列子

禹之爲水以身禱于陽紆之河

淮南子

元世祖

南巡渡江次鄂駐蹕於黃鵠山問山頭石磯何名呂公對曰聞唐時有道人呂姓吹笛其上故名又問曰唐以前何名皆不能對再三問之有一父老對曰聞諸古語云是禹功磯後人因訛傳大稱肯

嘉獎

林元大
禹廟記

禹功記云渡江河者以朱書禹字

佩之免風濤保安吉

直隸名勝志曰涿州西三

百餘里有錢柱山相傳禹維舟處蓋禹之治水始

于冀也

禹因古九圉以置九州

華陽
國志

洛書曰人皇始出繼地皇之後兄弟九人分理九

州爲九圉人皇居中州制八輔 路史曰人皇相

厥山川才爲九州謂之九圉別居一方因是區理

後世謂居方氏 項峻始學篇曰人皇九頭兄弟

九人九州各居其一 易卦坤靈圖蓋九州之始

也寶積記云伏羲審地勢定山川真源賦伏羲別

九宮因此置九州法語云始定四海之廣作八卦

分九州据共工氏霸九州則州之九不自帝嚳若

黃帝矣

史路

羅苹曰禹貢九州之畫實在治水之

後蓋因治水見地勢之分斷皆出自然不可十二

乃復爲九州爾 魯班刻石爲禹九州圖今在洛

城石室山

博物志

淮南墜形訓曰何謂九州東南

神州曰農土正南次州曰沃土西南戎州曰滔土

正西并州曰并土西北台州曰肥土正北濟州曰
成土東北薄州曰隱土正東陽州曰申土 王嘉
拾遺記曰玄龜河精之使者也龜領下有印文皆
古篆字作九州山川之字禹所穿鑿之處皆以青
泥封記其所使玄龜印其上今人聚土爲界此其
遺象也 楊慎曰王子年云禹治水所穿鑿處皆
有泥封使玄熊升其上此封堠之始按北堂書鈔
引山海經黃帝遊幸天下有記里鼓道路有記里
堆則堠起黃帝非始於禹

禹乃使太章步自東極至于西極二億三萬三千五百里七十五步使豎亥步自北極至于南極二億三萬三千五百里七十五步

墜形訓○高誘註太章豎亥皆禹臣

尹子曰禹之勞十年不窺其家手不爪脛不生毛偏枯之病步不相過人曰禹步

淮南子曰禹胼胝

呂氏

春秋曰舜殛鯀於羽山副以吳刀禹不敢怨而反事之官爲司空以通水潦顏色黎黑步不相過

楊子法言曰昔者姒氏治水土而巫步多禹

禹封高密以處于櫟是爲有夏曰夏伯

路史

世本云鯀生高密是爲禹宋云禹之封國櫟今之
許昌陽翟漢屬潁川唐隸河南有禹山禹故城及
鄭之櫟邑武王至周曰吾其爲有夏之居乎遂營
洛邑卽櫟也世紀云夏今陽翟地志云陽翟夏禹
國王克云禹繇夏而起湯自商而興皆本興昌之
地爲號重本不忘始也或云封在虹今之宿縣輿
地志云堯封夏禹爲伯邑于此卽位徙都陽翟漢
爲夏丘縣淮南子曰禹無十人之聚以王諸侯
夏之方有德也遠方圖物貢金九牧鑄鼎象物百物

而爲之備使民知神姦左傳

拾遺記曰禹鑄九鼎五者以應陽法四者以象陰

數使工師以雌金爲陰鼎以雄金爲陽鼎鼎中常

滿以占氣象之休否當夏桀之世鼎水忽沸及周

將末九鼎威震皆應滅亡之兆後世聖人因禹之

迹代鑄鼎焉

舊云九鼎者所謂九州鼎實則一鼎又別有九鼎圖九州之方物

路史曰禹作棧鍾於會稽以定奏

晉世剡縣民于田得鍾長七寸

口徑四寸銘曰棧案小爾雅鍾之小者棧音盞

鑄九鼎於紫金條荆之山

使人知神姦鼎成而太白見者九日

禹合諸侯于塗山執玉帛者萬國

左傳

直隸名勝志曰塗山在鳳陽府懷遠縣東南八里
水經云淮水出荆山之左塗山之右二山對峙禹
鑿爲二以通之禹合諸侯于塗山杜預謂在壽春
東北是也今山巔有禹廟山前有禹會村古史夏
本紀云禹合諸侯塗山其後南巡狩復會于江南
會稽宋蘇軾詩川鎖支祁水尚渾地理汪罔骨應
存樵蘇已入黃能廟烏鵲猶朝禹會村元賈元塗
山古碑曰禹娶于蜀塗山肇白人皇爲蜀君掌塗

山之國至會諸侯于塗山當以九江郡爲是東漢
郡志云山在當塗今有禹會村柳子有銘蘇子有
詩且于天下稍向中會同于此宜矣通鑑外紀亦
云禹娶塗山之女生子啓南巡狩會諸侯于塗山

紹興府志曰塗山在府城西北四十五里舊經

云禹會萬國之所山麓有石舩長丈云禹所乘

越絕

云塗山者禹
所取妻之山

蘇鶚演義云塗山有四一會稽二淪

州三濠州四當塗 四蕃志宋孝武使任延脩禹

廟土中得白璧三十餘枚意是時禹時萬國所執

梁初治廟穿得碎珪及璧百餘片

紹興府志

禹之治天下使民心變

莊

太公金匱云禹居人上慄慄如不滿日乃立建鼓

鬻子曰禹治天下以五聲聽治門懸鍾鼓磬鐸

而置鞀以得四海之士爲銘於荀箴淮南子曰

禹之趨時也履遺而弗取冠掛而弗顧非爭其先

也而爭其得時也又曰禹之裸國解衣而入衣帶

而出因之也墨子云禹舉益於陰方之中授之

以政而九州成陝西志曰禹崩于會稽壽百歲

見耕者五耦而式過十室之邑必下

禹作三章爲家天下之始

博物志曰處士東鬼塊

路史作東里槐

責禹亂天下事禹

退作三章强者攻弱者守敵戰城郭蓋禹始也

淮考

南子云夏鯀作三仞之城諸侯背之禹壞城平地散財物焚甲兵施之以德海外賓伏此與志互異

禹焚戈甲而夷人附

見崔融四鎮議

路史曰防風氏後至戮之以徇於諸侯伐屈騫攻

曹魏而萬國定

刀劍錄云高密在位十年以庚

戌八月鑄一劍藏之秦望山腹上面刻二十八宿

北記山水日月 紹興志曰禹劒宋時在禹祠殿
世相傳禹之所服寸刃出於鞬外瑩無繡澁而堅
不可拔

夏禹時天雨金三日

述異記

古詩云安得天雨金使金賤如玉又禹時天雨稻
古詩云安得天雨稻飼我天下民

同

瑞應云飛

菟日行三萬里禹治水土勤勞歷年天應其德而
至馭蹄者后土之獸自能語言王者仁孝於民則
出禹治水有功而來

禹命扶登氏爲承夏之樂歌九叙以樂其成是謂九

夏

路史

淮南子曰禹疏三江五湖注之東海以利黔首於是命皋陶作爲夏箴九成以昭其功路史曰舜歌九淵以美禹功禹因之爲大夏則固少昊之樂也

商高誥周公積矩之法禹所以治天下數之所出也

周髀
經

周髀算經注曰禹治洪水決流江河望山川之形

定高下之勢除滔天之災釋昏墊之厄使東注於海而無浸溺乃勾股之所由生也

禹有淫泆之意

呂氏春秋

古者儀狄作酒醪禹嘗而美遂疏儀狄

急就篇注

路

史曰帝女儀翟醢釀稷麥以爲酒澧醪變五味進之帝飲而甘之折頰而歎後世必有酒亡國者遂

疏儀翟

夏禹仙經取菖蒲玄酒封百日綠葉色

投黍米十四日飲之去三十六種風不自後世

本草

禹會諸侯江南計功而崩因葬焉命曰會稽

夏本紀

水經注云大禹卽位十年東巡狩崩于會稽因而
葬之 皇覽曰禹冢在山陰縣會稽山上會稽本

名苗山在縣南

漢始稱陵

越絕傳曰禹到大越上茅

山大會計爵有德封有功更名茅山曰會稽因病
亡歿葬會稽葦榔桐棺穿壙深七尺壇高三尺土
堦三等延袤一畝越之先君無餘乃禹之世別封
於越以守禹冢 呂氏春秋曰禹葬會稽不煩人
徒 墨子曰禹東教乎九夷道歿葬會稽衣衾三
領桐棺三寸 淮南子曰禹遭洪水之患陂塘之

事故朝歿而暮葬又曰禹葬會稽之山農不易其
畝 嘉泰志曰會稽山之東有隴隱若劍脊西向
而下下有窆石相傳此正禹葬處其窆石高丈許
狀如秤錘上有古隸不可讀

太史公有子遷二十而南游江淮上會稽探禹穴

史記

張晏注曰禹廟會稽因葬焉上有孔穴民間云禹
入此穴水經注曰會稽山東有礪去禹廟七里深
不見底謂之禹井云東游者多探其穴也 紹興
府志曰舊經諸書皆以禹穴繫之會稽宛委山今

里人卽以陽明洞爲禹穴寶曆中鄭魴於宛委山書禹穴二大字元楨銘而魴序之刻石存焉若據張說似謂穴卽禹陵據酈說又似指禹井惟舊經飛來石下爲禹穴傳云禹藏書處則指陽明洞然韓昌黎詩云常聞禹穴奇東去穿歐閩越俗不好古流傳失其真則禹穴不可定名久矣宋陳鵠耆舊續聞稱問之洪景盧言當以陽明洞爲是正德中閩鄭善夫著記謂得之非井之上楊慎又云在巴蜀 宋陳鵠云內翰洪公帥會稽曰余嘗問禹

穴有二處其一在禹廟告成觀穴上有窆石是也
其一去禹廟十餘里名陽明洞天卽稽山之麓有
石經丈餘中裂爲一罅濶不盈尺相傳指此爲禹
穴圖經云禹治水投玉簡於此穴中未知孰是公
云禹穴二字出司馬遷書必是秦漢以來相傳如
此張晏云禹入此穴不經之尤者子長謂上會稽
探穴言極其高深也今陽明穴投物於中不知其
底當以此爲禹穴非謂禹葬之地 鄭善夫禹穴
記曰禹穴在會稽山陰昔黃帝藏書處也禹治水

至稽山得黃帝水經於穴中按而行之而後水土
平故曰禹穴世莫詳其處或曰卽今陽明洞又云
禹旣平水土會諸侯稽功于塗山尋崩遂葬於會
稽之陰故山曰會稽穴曰禹穴至今窆石尚存或
然也善夫探禹穴尋黃帝藏書處乃翫梅梁摩挲
窆石得穴於韭井之上 楊慎丹鉛錄曰按蜀之
石泉禹生之地謂之禹穴其石杳深人跡不到頃
脩蜀志搜訪古碑刻有禹穴二字乃李白所書始
知會稽禹穴之誤 四川名勝志曰石泉縣南禹

穴二字大徑八尺李太白書刻在絕壁上見存

陝西志曰禹穴在海陽縣東一百三十里穴傍鑄

禹穴二字有古碑已剝落

越民獨以鳥田小大有差進退有行禹始也憂民救

水到大越必葬會稽教民鳥田一盛一衰

越絕書

地理志云會稽山上有禹井禹祠相傳下有羣鳥

耘田也 水經註鳥爲之耘春拔草根秋喙其穢

海上有草焉名篩其實食之如大麥七月稔熟名曰

自然穀或曰禹餘糧

博物志

述異記云今藥中有禹餘糧世傳昔禹治水棄其所餘糧於江中是爲藥也 紹興府志曰餘糧山在嵯縣北十五里舊名了山禹治水功畢其餘糧委棄在此化而爲石因名禹餘糧有禹祠在焉傍有石蒸籠甌山遺跡又曰水簾洞旁多禹餘糧石其形如拳碎之內有屑如屑或類麻或類豆隨人所欲而應

禹祀于社亦謂白帝

路史

淮南子云禹勞天下而歿爲社漢興立官社復立

官稷以禹配社以稷配稷 王符五德云少昊其

後白帝見流星意感生白帝文命

梅梁在禹廟梁季脩廟忽風雨大至湖中得一木取

以爲梁乃梅梁也

紹興府志

浙江名勝志曰會稽禹葬處窆石之左卽禹廟也

梁末脩廟得一木取以爲梁乃鄞縣大梅山頂梅

木張僧繇畫龍於上忽夜風雨飛入鏡湖與龍鬪

後人見梁上水草淋漓始駭之乃以鐵索鎖於柱

今所存他木猶絳以鐵索存故事見郡志

述異記曰越俗說會稽山

夏禹廟中有梅梁忽一春而生枝葉 紹興府志

曰禹廟之建似起于無餘祀禹之日

宋元以來咸祀禹于此

吳越春秋注東海人祭禹廟不用熊白及鼈爲

膳

水經注云鯀歿其神化爲黃龍晉語作黃能韋昭注能似熊字林云能足似鹿又爲鼈類

寰宇記宋武帝脩禹廟得古珪梁初又得青玉印

水經注禹廟有聖姑像禮樂緯云禹治水旱天

賜神女聖姑卽其像也 四蕃志聖姑從海中乘

石舟張石甍帆至此遂立廟廟中有石船船側掘

得鐵履一量

承帝曰嗟翼輔佐卿洲渚與登鳥獸之門參身洪流
而明發爾興久旅忘家宿獄麓庭智營形折心罔弗
屈徃求平定華獄泰衡宗疏事衰勞役

一作餘

伸裡鬱

塞昏涉南濱衍亨衣

一作永

制食備萬國其寧竄舞永

奔

禹碑釋文

徐靈期曰禹治水碑皆科斗文字昔樵者曾見之
自後無有見者輿地碑目云在蜀之夔門宋嘉定
初蜀士因樵夫引至其處以紙打其碑凡七十二
字皆不可曉後人以摹本刻岫巖觀中 劉禹錫

寄呂衡州詩云傳聞祝融峰山有神禹銘古石琅玕姿秘文龍虎形崔融云於鑠大禹顯允天德龍畫傍分螺書匾刻韓退之詩岫巘山尖神禹碑字青石赤形模奇古今稱述禹碑者不一今刻于嶽麓書院者凡七十七字 楊慎禹碑歌序云禹碑在衡山絕頂迨宋朱張同遊南岳訪求不獲後晦翁著韓文考異遂謂衡山實無此碑再考六一集古錄趙明誠金石錄鄭漁仲金石畧云三家古刻臚列獨不見所謂禹碑者碧泉張子得墨本于楚

予撫卷而嘆 顧璘曰沈生所得碑本乃嘉靖初
長沙守新安潘君鑑得于嶽麓書院後剜苔剔土
揭傳人間蓋宋人所模刻上古書跡自是異寶雖
傳刻固可貴也古者書法之興皆取象山川蟲魚
草木之類禹精于水今篆體皆有流水形出禹無
疑 林華讀禹碑辨曰世傳神禹登祀衡岳而勒
碑嶽麓碑張光叔謂何子一曆榻岫嶠本也考之
志載衡嶽七十二峯稱禹碑者二岫嶠雲密也雲
密稱峰上有禹王廟科斗書岫嶠則直稱禹碑耳

述異記曰崆峒山中有堯碑禹碣皆籀文焉

十洲記曰禹經諸五嶽使工刻石識其里數高下
其字科斗書今丈尺里數皆禹時書也不但刻廟
五嶽諸名山亦然刻山之獨高處爾 王翰禹甄
辯云夏縣治西十五里有禹故城城中民聚爲村
掘地得甄方尺餘而中畫十二方方容一字以篆
書之其文曰海內勛臣歲豐登穀路無饑人雖累
千百不異訛傳謂禹所陶者